

REGIONAL NEWS BULLETIN

HEADLINES (EVENING)

- 1. State chhunga Village Council (VC) leh Local Council (LC) inthlan atana campaign hun chu vawiin tlai dar 4 khan khar a ni a, silent period hman tan a ni.
- 2. Vawiin Village Council leh Local Council inthlana campaign theih hun hnuhnung khan, political party te chuan theihtawp chhuahin mipui vote an zawng.
- 3. Prime Minister Narendra Modia chuan vawiin khan zirlai naupangte nena inkawmna hun Pariksha Pe Charcha programme a hman.
- 4. Pariksha Pe Charcha hi Mizoram atangin Governor Gen (Retd) Vijay Kumar Singh hovin vawiin khan Video Conference hmangin zirlai ten an chhim.



SILENT PERIOD

State chhunga Village Council (VC) leh Local Council (LC) inthlan atana campaign hun chu vawiin tlai dar 4 khan khar a ni a, silent period hman tan a ni.

State Election Commissioner Dr.H. Lalthangliana chuan inthlang turin engkim peihfel a ni tawh tih a sawi a, VC/LC inthlan vote thlak hi nilaini, ni 12 khian neih tur a ni a, vote nei zawng zawng te rilru thianghlim tak pu a vote thlak theuh turin a sawm a ni.

(Byte of State Election Commissioner)

Pu Lalthangliana chuan, MPF leh NGO hrang hrang te nen an thawhhona a that avang leh Mizoram mipuite an changkan vang bakah tulloo in beih an chin loh avangin inthlan muanawm tak neih a nih thin thu Akashvani correspondent a hrilh a. Tun LC/VC inthlan turah hian Person on Election Duty leh voter ten an roll awlsam taka an en theih nan ECI website ah dah nih dawn bakah, vote tla te a ruala chhiar tum a ni a ti a, hei hi Mizoram ah an tih vawi khatna tur a ni.

Tun tuma vote tla te hi zan dar 7 atanga chhiar tan tur a ni a. Vote thlak that ngai a awm a nih chuan ni 13, ningani ah thlak leh tur niin ni 13 vek dar 7 hnulam ah vote thlak that ngai te chu chhiar leh nghal a ni bawk ang. Thlan tharte chu ni 14, zirtawpni ah insiamrem hman tur niin, Ni 15-inrinni ah inthlan hmawr bawk a ni ang.

Autonomous District Council awmna tiam lovin, Mizorama district 9-ah hian VC 544 awmin bial 2,416 a awm a. Bial 1,803 te hi tu pawhin chuh theih a

nih laiin bial 613 hi hmeichhe tana hauh bik a ni. Bial 2,416 chuh tura hming pelut hi mi 6,829 awmin candidate 5,178 te chuan tu pawhin a a chuh theih bial an chuh a, hmeichhe tana hauh bik bial chuhtu hi mi 1,651 an ni.

Aizawl Municipal Corporation (AMC) huam chhungah hian LC 87 awmin bial/member 575 a awm a, bial 418 chu duh duh chuh theih niin bial 157 chu hmeichhe tana hauh bik a ni. AMC huam chhunga LC inthlan chuhtu hi general seat-ah mi 1,211 leh hmeichhe tana hauh bik chuhtu mi 448 an awm a ni.

Lunglei Municipal Council (LMC) huam chhunga LC 24-ah hian bial 148 awmin mitin chuh theih bial 110 leh hmeichhe tana hauh bik bial 38 a awm a. Mitin chuh theih bialah candidate 309 awmin hmeichhe bial bik chuhtu 108 an awm baw k a. LMC hnuaia LC te hi an inthlan hmasakna ber tur a ni.

<><><>

CAMPAIGN ENDS

Vawiin Village Council leh Local Council inthlana campaign theih hun hnunung khan, political party te chuan theihtawp chhuahin mipui vote an zawng a,

ZPM party chuan Aizawl Press Club ah chanchinbu mite kawmin, an party chu Mizorama politics harhtharna thlentu, mipui beisei leh inghahna party awm chhun a ni an ti a, LC/VC inthlan lo awmtur ah pawh mipuiten hnehna sang tak an chantir ngei an beisei thu an sawi.

Chief Minister Pu Lalduhoma kaihruai Kalphung thar mipui Sorkar chuan ram rorelna a chelh tirh atangin beihna leh sawichhiatna karah, tha thlah lovin ram hmasawanna hna tam tak kum khat lek chhung pawhin a thawk tawh a, hmachhawp leh hna kal lai mek pawh thahnem tak a awm mek tih TBC Lalthlanmawia, General Secretary Media & Publicity, ZPM chuan a sawi a ni.

LC/VC te chu Sorkar kutke pawimawh tak leh mipui nena inngheng tlat an nih thu a sawi a, inkawp rem tak leh State Sorkar policy tuipui tur leh phur taka Sorkar hmalakna mahni veng theuha kalpui thei tur Village Council member thlan chhuah a pawimawh hle dawn a ni, a ti.

Mizo National Front Party Sr. Vice President Dr. R. Lalthangliana chuan Village Council leh Local Council te'n sawrkar an thawhpui tha duh lo tih sawrkar hotute'n an sawi ri fo chu vanduaithlak a tih thu sawiin MNF sawrkar laia Covid hripui avanga Village Council leh Local Council inthlan sawn hlat a ngaih khan an party chuan opposition party tha takin an thawhpui thei tih sawiin Covid dona kawnga India rama ti tha ber Mizoram a nih theih chhan lian tak an ni a ti a, inthlanna hmachhawn turin an party chu an inpeih tawh thu leh mipui rorelna venghim turin khua leh veng tinah mipuite duhthlanna ngai pawimawh chung a hmasawanna hna thawktu tur candidate an dah fel vek tawh tih sawiin mipui rorelna venhim a nih theihna atan Zoram mipuite chu taima taka vote thlak turin a sawm tih a sawi.

MPCC President Pu Lalthanzara chuan Lungleia Congress Bhawan ah thusawiin Cong.party chu sakhaw zalenna danpui a dahtu an ni a, tunah chuan BJP a sorkar a, danpuia sakhaw zalenna tihbo tumin hma an la mek a, chanchin tha hrilh a har ta hle a ti a, MNF in MIP an hlawhchham pui a, ZPM in Bana kaih policy ah tu tan mah Guarantor ah an tang lova, hmunphiah a tovin an lei baw k lo a ni a ti a,

kum 30 chhunga tih engmah nei lova min tu ten thil an tihzia an hrechiang tawh. Damdawiin leh Lengpui airport enkawl an huphurh a, Mini hydel project pawh sumdawng pek an tum a, Congress hmalak tawhna an hralh zawh an hlahu thu a sawi a ni.

Vawiin khan MPCC hruaitute chuan Aizawl Press Club ah thuthar lakhawmtute an kawm a, MPCC chuan hriat theih chinah VC/LC term pawhtawi chu Mizoramah a vawikhatna a ni an ti a, VC leh LC Term chu vawi khat Covid len lai khan pawhsei a lo ni tawh a, chhan tha tak vanga pawh tawi a ni a. Sawrkar kal tawh te ah hetiang mipui thlan te term pawhtawi hi kan hre ngai lova, puitling takin an thawhpui zawk thin a, inthliarna a awm an hre ngai lo an ti. Tun inthlana mipui thlan te chu sorkar lai chuan a thawhpui thei tur a ni a, chu chu Democracy kalphung a ni tih sawiin, VC leh LC chu a pawimawh em em a, mipui sorkar inti, mitin huap auhla-a nei ten party dang VC leh LC te thawhpui theilo tura sawi chu a fuh loh thu leh, Khawtlangin anmahni enkawl tura tha bera an thlan te chu sorkar in a thawhpui mai tur a ni an ti bawk.

BJP Mizoram party inkhawm vawiina Aizawla neihah State Core Group Member Dr. K. Beichhua, MLA chuan thusawiin tuna Congress Party dinhmun chu a Chiang hle a, tun tum Delhi-a inthlanah pawh Congress Party dinhmun chu Zero a ni, a ti a. Mizoram ah tlem in Delhi ai chuan an tha hret a, a chhan chu; MLA pakhat an neih vang a ni a ti a, India rama Congress Party chu a zung a nget tawh a, that chhuah leh a har viau dawn avangin Mizoram ah pawh Congress Party chuan awngrawp lam a pan a, tunah MLA pakhat an nei a, nimahsela nakin lawk ah erawh Mizoram ah pawh Gold Medal la phak si lovin, Silver Medal leh Bronze Medal lak hi an hna ber tur a ni tawh dawn a ni," a ti.

Dr K Beichhua chuan Mizoram Sorkar chu rethei leh harsa tak nimahse, BJP thawhpui an hreh avangin sum puk tur zawngin an phi ruai a, thlatin Sum an puk ta tlah tlah mai a ni. Mipui a an in zawrhna an thutiam an ti hlawhtling hleithe lova, Fapa tlanbo dinhmun nen te pawh an in ang dawn viau a, tunah BJP bel lovin tlan tlan mah sela, an tlanbo na ah eitur an tla chham anga, ei tur an hmuhloh hun engtikah emaw chuan inchhir hun neiin, an la inlamlê ngei dawn a ni, a ti bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PPCH

Prime Minister Narendra Modia chuan vawiin khan zirlai naupangte nena inkawmna hun Pariksha Pe Charcha programme a hmang. PM Modia chuan zirna chu a pawimawh thu sawiin nun pumpui hmasawna tur a ni a ti a. Zirlai te chu inchhung luma inkhung ngut ngut lo tura chahin hmasawn zel tur chuan an thil tihchak zawngte pawh tia an vahchhuah ve a ngai a ni a ti a. Hei hian an in exam naah a pui thei dawn a ti a. Thuziah lamah tan la a, an nunphunga beh tir tlat turin a chah bawk a ni.

Pu Modia chuan zirlaite chu ei leh in hrisel ngai pawimawh turin a chah a. Mut hun ngai pawimawh tura chahin zing hma taka tho a, ni chhuah hunah lo che chhuak hman thei turin a chah bawk a ni. He hunah hian zirlai naupang bakah nu leh pa leh zirtirtute te chu kawmin exam inbuatsaihna, rilru hahna leh mimal hmasawn zelna turte a sawipui a. He programme hi Akashvani,

Doordarshan, PMO Youtube Channel leh Union Education leh Information and Broadcasting Ministry social media channel ah te tihchhuah a ni.



PARIKSHA PE CHARCHA 2025

Prime Minister Narendra Modi hova New Delhi-a 'Pariksha Pe Charcha (PPC)' tum 8-na neih chu Mizoram atangin Governor Gen (Retdr) Vijay Kumar Singh hovin vawiin khan Video Conference hmanga chhim a ni.

He program hi exam hmachhawn mai tur zirlaite bakah nu leh pa leh zirtirtute tana ruahman niin, kumin hi a tum 8-na a ni a, he hunah hian mi vaibelchhe 5 chuang tela chhut niin an tam ber tum a ni. Mizorama zirlaite, nu leh pate, zirtirtute leh School Education official-te pawhin he hun hi Governor hovin SCERT Auditorium & Conference Hall, Chaltlang atangin video conference kaltlangin an chhim a. Program zawh hnu hian Governor chuan zirlaite kawmin exam hmachhawn kawnga pawimawhte inpawhtlang takin a sawi pui a ni.

Vawiin vek khan Saitual Middle School-I, Saitual Venglaiah, District Bawrhsap Dr. Lalgura Tlau hoin zirlai naupangten online-in an chhim bawk a. Programme a zawh hnu hian zirlaite chu exam hmachhawn kawnga an hriat tur pawimawhte hrilhfiat an ni.

Puan tawh angin St Pauls Higher Secondary School zirlai Lalnunsangi Ralte, Pawl 10 zirlai chu kum 2025 Pariksha Pe Charcha 8th Edition ah Prime Minister Narendra Modi nen inkawm tura thlan a ni.

